

समे – 12:25 hrs.

&lt;&gt;&lt;&gt;&lt;&gt;&lt;&gt;&lt;&gt;&lt;&gt;

एह आकाशवाणी जम्मू ऐ, हुन तुस श्रुति खजूरिया कोला खबरां सुनो।

### NHW

जम्मू-श्रीनगर राष्ट्री जरनैली शिड़क केई सारी थाहरें पर ल्हास-पस्सियां ते कुप्पड़ पौने ते शिड़क पर गार आई जाने करी गड़डिं दी आओजाई लेई बंद होई गई ऐ। आकाशवाणी जम्मू संवाददाता दी रिपोर्ट मूजब एह शिड़क फिलहाल आओजाई लेई बंद ऐ की जे एह इसलै यातायात लेई सुरक्षित नेई ऐ। ताआई, ऐतिहासिक मुगल रोड जेड़ी जम्मू खिते दे राजौरी ते पुंछ जिले गी घाटी दे शोपियां जिले कन्नै जोड़दी ऐ, ओह बी उच्चिए धारें पर बर्फबारी होने मगरा गड़डिं दी आओजाई लेई बंद ऐ। प्रशासन नै लोके गी हिदायत कीती ऐ जे ओह शिड़क दे पूरी चाल्ली बहाल होने मगरा गै आवाजाई करन।

&lt;&gt;&lt;&gt;&lt;&gt;&lt;&gt;&lt;&gt;&lt;&gt;

### Pan India SIR

मुख्य चुनांs आयुक्त ज्ञानेश कुमार होरे आखेआ ऐ जे चुनांs कमीशन नै मुख्य भरै च विशेष नजरसानी आहला अभियान चलाने दा फैसला पैहले गै लेई लैते दा ऐ। कल नमीं दिल्ली च संवाददाता सम्मेलन गी संबोधित करदे होई उनें आखेआ जे पूरे भारत च हर इक राज्य ते केंद्र शासित प्रदेश च एह अभियान चलाने लेई तरीके दी औपचारिक घोशणा दा फैसला तौले गै लैता जाग। बिहार च विधानसभा चुनांs कोला पैहले चुनांs आयोग नै विशेष नजरसानी आहला अभियान चलाया हा जेदे कन्नै 69 लक्ख मतदाताएं दे नां सूची थमां हटाए गे। इन्दे च गैर कन्नूनी तरीके राएं इत्थे रवारदे प्रवासी ते इक शा मते मतदाता पंछान पत्रर यानि वोटर आई.डी कार्ड रक्खने आहलें दे नांs बी शामिल हे। भारती चुनांs आयोग नै बिहार च असेंबली दे चुनाएं दे कन्नो-कन्नूनी जम्मू-कश्मीर च नगरोंटा ते बडगाम असेंबली सीटें लेई उप-चुनाएं दे कार्यक्रम दा बी अज्ज ऐलान करी दिता ऐ। इस सरबंथे च इक संवाददाता सम्मेलन गी संबोधित करदे होई भारत दे मुख्य चुनांs आयुक्त ज्ञानेश कुमार होरें ऐलान कीता जे जम्मू-कश्मीर दिएं इनें द'ऊं असेंबली सीटें पर उप-चुनांs औंदी 11 नवंबर गी करवाया जाग ते वोटें दी गिनतरी दा कम्म 14 नवंबर गी होग। उपचुनांs लेई अधिसूचनां 13 अक्टूबर गी जारी कीती जाहग जिसलै के नामजदगियां दाखल करने दी खीरी तरीक 20 अक्टूबर होग। मेदवारें दे नामजदगी आहले कागदें-पत्रें दी जांच 22 अक्टूबर गी होग ते मेदवार जेगर चाहन तां 24 अक्टूबर तगर अपनी मेदवारी परताई सकडन। ध्यानजोग ऐ जे मुख्यमंत्री ओमर अब्दुल्ला होरें पिच्छले बरें होए दे असेम्बली चुनाएं च बडगाम ते गांदरबल, दौनें सीटें परा जित हासल कीती ही ते मगरा उ'नें बडगाम दी सीट छोड़ी देने दा फैसला लैता हा। एहदे अलावा नगरोंटा दी असेम्बली सीट, पिच्छले बरें 31 अक्टूबर गी बीजेपी नेता देवेन्द्र सिंह राणा हुंदा काल होई जाने पर खाली होई गई ही।

&lt;&gt;&lt;&gt;&lt;&gt;&lt;&gt;&lt;&gt;&lt;&gt;

### Dy CM Snow Clearance

जरूरी चीजें बस्ते दी उपलब्धता ते कश्मीर खिते च महत्व आहले इदारे दे सुचारु कम्मकाज गी यकीनी बनाने लेई उपमुखमंत्री सुरेंद्र चौधरी होरें इक उच्च सतह दी बैठक लाइयें मकेनिकल ते हास्पिटल इंजीनियरिंग मैहकमें दे कम्मकाज ते तैयारिणं दा जायजा लैता। बैठक दुरान उपमुखमंत्री होरें बड़ी मती ठंड आहले मौसम करी पैदा होई दिणं चुनौतिणं खास करी कश्मीर घाटी ते जम्मू खिते दे ओह इलाके जित्थे बर्फबारी हुंदी ऐ, उत्थे उपलब्ध सहूलतें दा जायजा लैता। बड़ी मती बर्फबारी होने दी आशंका दे मददेनजर उनें मैहकमें गी हिदायत कीती जे ओह भलेआं अज्जै-कल्लै स्हाबै मशीनां, तौले कारवाई, यातायात गी सुचारु बनाने ते लोके दी सुरक्षा गी यकीनी बनान।

<><><><><><>

#### Dy CM H&H Review

उपमुखमंत्री सुरेंद्र चौधरी होरें हत्थखंडी ते दस्तकारी मैहकमे दे कम्मकाज ते कारकरदगी दा इक उच्च सतह दी बैठक दुरान जायजा लैता। बैठक दुरान उपमुखमंत्री होरें गी चलाई जा'रदी बड़ी मती महत्व आहली फ्लैगशिप स्कीमें ते हत्थखंडी ते दस्तकारी क्षेत्र गी लाह पजाने लई चलाई जा'रदी नीतिणं दी बी जानकारी दिती गई, खास करी ध्यान नमीं उन्न, हत्थकरघा ते दस्तकारी सरबन्धी नीति पर दिता गेआ। उपमुखमंत्री होरें प्रशासनिक मैहकमे गी हिदायत कीती जे ओह पैहले ते मगरा आहले बरे दे आंकड़ें गी दिक्खन ते अगली बैठक च उनेंगी आहन्न तां जे इक सेई ते पूरा पराता खाका तैया कीता जाई सके। उनें इक बारी फही दोहराया जे सरकार दस्तकारें ते बुनकरें दे कल्याण लेई बचनबद्ध ऐ।

<><><><><><>

#### CS-IT Review

मुख सचिव अटल डुल्लू होरें कल जम्मू-कश्मीर च सूचना प्रौद्योगिकी विभाग ते राश्ट्री सूचना केंद्र दे कम्म-काजें दा जायजा लैने लेई इक उच्च सतह दी बैठक दी अध्यक्षता कीती। बैठक दी शुरूआत च मुख सचिव होरें साइबर सुरक्षा दे महत्व पर जोर पाया ते तहसील थमां ब्लाक स्तरें तगर इसी होर मजबूत करने दा आह्वान कीता। उनें सूचना प्रौद्योगिकी विभाग गी निर्देश दिते जे ओह समूलचे जम्मू-कश्मीर च सब्बै तहसील दे ब्लाक दफतरें च ई-आफिस नेटवर्क दा व्यापक विस्तार यकीनी बनान। एहदे अलावा मुख सचिव होरें उनें दफतरें बारें तफसीली रिपोर्ट मंगी जेड़े अजे तगर ई-आफिस सरिस्तें च शामिल नेई होए न। एहदे शा पैहले उनें E-SAM (Electronic system of asset management) पोर्टल दी शुरूआत कीती जेहदा मकसद लागत ते जोखम गी घट्ट करदे होई परिसंपत्तियें दे बेहतर इस्तेमाल गी यकीनी बनाना ऐ।

<><><><><><>

#### Secy. Rational Drug Use

सेहत ते मेडिकल शिक्षा सचिव डॉ. सैयद आबिद रशीद शाह होरें बच्चें आस्तै दोआइयें दा इस्तेमाल बड़ी समझदारी कन्नै करने दी सलाह दिती। श्रीनगर दे सिविल सचिवालय च लग्गी दी इक बैठक दी अध्यक्षता करदे होई उनें एह गल्ल आकखी। एह बैठक केंद्री सेहत ते परोआर कल्याण मंत्रालय आसेआ हाल च जारी इक नोटिस दे बाद सददी गेदी ही जेदे च इस गल्लै दी सफारिश कीती गई ऐ जे द'ऊं बरें शा हेठली उम्मी दे बच्चें गी खंग ते जुकाम दियां दोआइयां नेई दितियां जान। बैठक दुरान डॉ. सैयद होरें पूरे जम्मू-कश्मीर च बच्चें दी

सेहत दिक्खभाल लेई दोआइयें दा समझदारी कन्नै इस्तेमाल पर जोर पाया ते सब्बनै सरबंधत पखें गी निर्देश दिते जे ओह राष्ट्री सतह दे दिशा-निर्देशों दा सख्ती कन्नै पालन करन।

<><><><><><>

#### GST-Maharashtra

जीएसटी दियां नमियां दरां 22 सितंबर थमां लागू होई गेदियां न ते इंदा लाह समाज दे हर तबके गी थहोआ करदा ऐ। अज्ज इक नजर जीएसटी सुधारें थमां महाराष्ट्र दी अर्थ बवस्था पर पौने आहले सकारात्मक प्रभावें पर। तगड़ी कृषि, बंज बपार ते सेवा क्षेत्रें आहली महाराष्ट्र दी अर्थ बवस्था गी हाल च गै होए दे जीएसटी सुधारें थमां मता लाह पुज्जा ऐ। नमैं जीएसटी सुधार महाराष्ट्र दे करसानें, कारीगरें ते लौहके कारोबारियें लेई बड्डी राहत ऐ। नमैं कर ढांचे तैहत राज्य च नेकें बस्तुएं पर हुन पैहले दे 12 प्रतिशत दे बजाय 5 प्रतिशत जीएसटी लग्गोग। एह गैंs महाराष्ट्र दे चीनी क्षेत्रें लेई सार्थक ऐ ते खंड 6-7 प्रतिशत सस्ती होई जाग जेदे कन्नै 50 लक्ख शा मते गन्ना करसानें ते 2 लक्ख मिल मजदूरें गी लाह पुज्जोग। समुंद्री उत्पादें पर टैक्स 12 फीसदी थमां घटाइयै 5 फीसदी करी दिता गेआ ऐ।

<><><><><><>

Read by: Shruti Khajuria

Composed : Varinder Sharma

Editor: Kunal Shrivatsa